

(SI-201/15-F)

**ЗАВОД ЗДРАВСТВЕНОГ ОСИГУРАЊА И
РЕОСИГУРАЊА ФЕДЕРАЦИЈЕ
БОСНЕ И ХЕРЦЕГОВИНЕ**

310

Na osnovu člana 25. Pravilnika o bližim kriterijima za izbor lijekova, postupku i načinu izrade Liste lijekova Fonda solidarnosti Federacije Bosne i Hercegovine, kao i korištenju lijekova sa Liste lijekova Fonda solidarnosti Federacije Bosne i Hercegovine ("Službene novine Federacije BiH", br. 36/11, 60/12 i 82/14), Upravni odbor Federalnog zavoda zdravstvenog osiguranja i reosiguranja, na sjednici održanoj dana 28.11.2014. godine, donio je

UPUTSTVO

**O USPOSTAVI LISTE ČEKANJA ZA LIJEKOVE SA
LISTE LIJEKOVA FONDA SOLIDARNOSTI
FEDERACIJE BiH**

I - OSNOVNE ODREDBE**Član 1.**

Ovim uputstvom utvrđuje se postupak i način utvrđivanja Liste čekanja za određene lijekove sa Liste lijekova Fonda solidarnosti Federacije BiH (u daljem tekstu: Lista čekanja za lijekove), kriteriji za stavljanje na Listu čekanja za lijekove, način vođenja odnosno kontinuiranog praćenja Liste čekanja za lijekove, te obaveza informiranja osiguranog lica o bitnim podacima sa Liste čekanja za lijekove.

Liste čekanja utvrđuju se za određene lijekove sa Liste lijekova Fonda solidarnosti, Federacije BiH u slučaju nedostatka finansijskih sredstava Zavoda zdravstvenog osiguranja i reosiguranja Federacije BiH (u daljem tekstu: Federalni zavod).

Član 2.

Ovim uputstvom se treba osigurati jednak tretman svih osiguranih lica (u daljem tekstu: pacijent) kojima je indiciran terapijski tretman određenim lijekovima finansiranim sredstvima fonda federalne solidarnosti.

Član 3.

Pacijent se stavlja na Listu čekanja za lijekove, samo ukoliko je lijek preporučen od strane medicinskih stručnjaka, odnosno nadležnog konzilija zdravstvene ustanove i prihvaćen od strane nadležne komisije Federalnog zavoda za uvođenje osiguranika u pravo korištenja lijekova sa Liste lijekova fonda federalne solidarnosti (u daljem tekstu: nadležna komisija Federalnog zavoda).

II - LIJEKOVI ZA KOJE SE MOGU UTVRDITI LISTE ČEKANJA**Član 4.**

Lijekovi sa Liste lijekova Fonda solidarnosti za koje se može utvrditi lista čekanja su:

1. Lijekovi za terapiju malignih neoplazmi sa posebnim režimom propisivanja
2. Lijekovi za liječenje multiple skleroze
3. Biološki lijekovi za liječenje upalnih bolesti debelog crijeva (Morbus Chron, ulcerozni colitis).

Izuzetno, lista čekanja se može utvrditi i za druge lijekove sa Liste lijekova Fonda solidarnosti, a koji nisu utvrđeni stavom 1. ovog člana po istim kriterijima utvrđenim ovim Uputstvom.

III - POSTUPAK UTVRĐIVANJA LISTE ČEKANJA**Član 5.**

Utvrđivanje Liste čekanja za lijekove, obuhvata stavljanje na ovu listu čekanja i unos propisanih podataka sa brojem bodova na osnovu utvrđenih kriterija.

Listu čekanja za lijekove uspostavljaju nadležne komisije Federalnog zavoda na osnovu evaluacije medicinske dokumentacije dostavljene od strane konzilija zdravstvenih ustanova i utvrđenih kriterija ovim uputstvom.

Član 6.

Unos podataka za stavljanje pacijenta na Listu čekanja za lijekove vrši ovlašteno lice Federalnog zavoda koje prisustvuje sastancima nadležne komisije Federalnog zavoda na Obrascu liste čekanja za lijek "LP-1", koji je sastavni dio ovog uputstva.

IV - KRITERIJI ZA STAVLJANJE NA LISTU ČEKANJA**Član 7.**

Kriteriji za stavljanje pacijenata na Listu čekanja za lijekove su:

1. Zdravstveno stanje pacijenta (klinički postavljena dijagnoza sa preporukom konzilija za određeni lijek, očekivani tok bolesti, medicinske kontraindikacije za primjenu druge terapije, očekivani terapijski rezultat liječenja);
2. Step en hitnosti (veoma hitno, hitno, normalno) i
3. Dužina čekanja.

Član 8.

Stavljanje pacijenta na Listu čekanja za lijekove za određeni lijek vrši nadležna komisija Federalnog zavoda, a na osnovu kriterija utvrđenih u članu 7. ovog uputstva.

Utvrđivanje statusa pacijenta na Listi čekanja za lijekove vrši nadležna komisija Federalnog zavoda, na osnovu kriterija iz člana 7., bodovanjem, kako slijedi:

- 1) Zdravstveno stanje pacijenta (klinički postavljena dijagnoza sa preporukom konzilija za određeni lijek, očekivani tok bolesti, medicinske kontraindikacije za primjenu druge terapije, očekivani terapijski rezultat liječenja).
Maksimalno 30 bodova.

2) Stepen hitnosti (veoma hitno, hitno, normalno)	
a) Veoma hitno	20 bodova
b) Hitno	12 bodova
c) Normalno	7 bodova

3) Dužina čekanja	
a) Do 6 mjeseci	15 bodova
b) Od 7 do 12 mjeseci	25 bodova
c) Od 13 do 18 mjeseci	35 bodova
d) Od 19 do 24 mjeseca	45 bodova
e) Preko 24 mjeseca	55 bodova

Status pacijenata na Listi čekanja za lijekove odnosno sukcesivni redoslijed pacijenata na Listi čekanja za lijekove određuje ukupan broj bodova od najvećeg do najmanjeg broja.

Broj bodova za kriterije iz tač. 1) i 2) utvrđuje nadležna komisija Federalnog zavoda, dok je bodovanje za kriterij iz tačke 3) jasno precizirano.

Ažuriranje Liste čekanja za lijekove po osnovu navedenih kriterija i revidiranje broja bodova vrši se kontinuirano.

V - PROMJENE NA LISTI ČEKANJA

Član 9.

Promjene statusa pacijenata na Listi čekanja za lijekove, kojima se osigurano lice skida sa Listi čekanja za lijekove može biti iz medicinskih i nemedicinskih razloga:

- Medicinski razlozi:
 - izostanak terapijskih efekata liječenja;
 - neželjeni efekti liječenja (Nus pojave) i nepodnošenje terapije;
 - pogoršanje zdravstvenog stanja i prevođenje pacijenta na terapiju drugim lijekom.
- Promjene na Listi čekanja za lijekove iz nemedicinskih razloga:
 - promjena prebivališta osiguranika koja mijenja status osiguranika;
 - izmještanje na liječenje u inostranstvo;
 - izjava pacijenta u pisanoj formi da ne želi koristiti propisanu terapiju i smrtni ishod prije početka primjene preporučenog lijeka.

Član 10.

Promjene redoslijeda pacijenata na Listi čekanja za lijekove nadležna komisija Federalnog zavoda će napraviti u slučajevima prijema i procjene konzilijarnih mišljenja za nove pacijente i prilikom evaluacije kriterija za listu čekanja za pacijente koji se već nalaze na Listi čekanja za lijekove.

Član 11.

Izuzetno, u slučaju hitnosti, odnosno neposredne životne ugroženosti, nadležna komisija Federalnog zavoda može pacijentu izdati saglasnost za uvođenje u pravo korištenja lijeka koji mu je indiciran, bez obzira na njegov status na Listi čekanja za lijekove.

U slučaju iz prethodnog stava, nadležna komisija Federalnog zavoda je dužna ovom Zavodu dati pismeno obrazloženje hitnosti, odnosno neposredne životne ugroženosti, na temelju važećih savremenih medicinskih smjernica i preporuka, te stručno-medicinskih standarda i dobre kliničke prakse.

Član 12.

Konzilij zdravstvenih ustanova dužan je u rokovima od najmanje tri (3) mjeseca, a po potrebi i kraće, izvršiti evaluaciju liječenja za svakog pacijenta, a konzilijarno mišljenje dostaviti nadležnoj komisiji Federalnog zavoda u skladu sa doktrinarnim pristupom, sa ciljem revidiranja Liste čekanja za lijekove.

VI - PRUŽANJE INFORMACIJA OSIGURANIM LICIMA O STATUSU NA LISTI ČEKANJA ZA LIJEKOVE

Član 13.

Federalni zavod dužan je na lično traženje pacijenta, omogućiti mu neposredan uvid u Listu čekanja za lijekove, odnosno na pismeni zahtjev pacijenta pružiti informaciju o statusu na Listi čekanja za lijekove i eventualnim promjenama uz obrazloženje, kao i o terminima održavanja sastanaka nadležne komisije Federalnog zavoda, ali isključivo za pacijenta koji je podnio zahtjev, odnosno tražio neposredan uvid.

VII - PODACI KOJE MORA SADRŽAVATI LISTA ČEKANJA

Član 14.

Lista čekanja za lijekove mora sadržavati sljedeće podatke u obrascu LP-1:

- Redni broj;
- Prezime i ime;
- Jedinstveni matični broj (JMB);
- Konzilij ZU koji je dao preporuku za liječenje;
- Mjesto prebivališta, Kanton i Zavod zdravstvenog osiguranja (ZZO) kome pacijent pripada;
- Datum uvrštavanja na Listu čekanja za lijekove;
- Bodovi - procjena zdravstvenog stanja pacijenta;
- Bodovi - stepen hitnosti;
- Bodovi - dužina čekanja;
- Ukupno bodova;
- Napomenu o činjenicama koje utiču na promjenu u Listi čekanja za lijekove ili razlog brisanja pacijenta sa Liste čekanja za lijekove.

Lista čekanja priprema se u elektronskoj i pisanoj formi, a naziv lijeka na koji se odnosi Lista čekanja unosi se iznad tabele obrasca LP-1.

Federalni zavod je dužan da jednom u šest (6) mjeseci izvjesti federalnog ministra zdravstva i Upravni odbor Federalnog zavoda o statusu Liste čekanja za lijekove.

VIII - PRELAZNE I ZAVRŠNE ODREDBE

Član 15.

Federalni zavod uskladit će postojeće Liste čekanja za lijekove sa odredbama ovog uputstva, u roku od 90 dana računajući od dana njegovog stupanja na snagu.

Član 16.

Ovo uputstvo će se objaviti u "Službenim novinama Federacije BiH", a stupa na snagu osmog dana od dana objavljivanja.

Broj 02/I-01-1-579-1/15

27. februara/veljače
2015. godine

Predsjednica U.V.
Bodnaruk Snježana, s. r.

Saglasnost na ovo Uputstvo dao je federalni ministar zdravstva aktom broj 01-37-1111/15 od 26.02.2015. godine

